

Efesus

Pol re Efesus kwomri tatame remne basrasem siglow.

Kiyi late tuma.

Gwor siglow Pol re basrasem, re Efesus kwomke temenem Jisas rene habobo tatame remne newopitim. Efesus kwom et Turki nowselke tetane. Agerbo kwomri tatame rem Jisas rene habobem, rem gwor siglow kirkir poten labem.

Gwor tuma yenbo Pol re remne basrasem. God re hekna habona wos nenem. Aboyei woskene tatamekene rem Haneyen Jisas eterri kulke tete tetane. (1:10) God re etop wem. Jisas rene habobo tatame rem gesmasekap. Remri Ha wuriketwou, et Apiy God eter. God re Jisas rene habobo tatame remne kenem, rem eterri tatame tem. Jisas re remri yaper nenbem wuleke san reri nepke God rekene kelmenam. Sene re God Reri Wow werasen yam, re rene omuteke habobo tatame remne kwokwos kwokwos kwobo labo, rem wule yenbo ek nenbo. (1:14)

Pol re God reri kik tetane tuma tobo heyar op wesowem. Kraisi re taresi tame, rene habobo tatame rem reri wesomkap. (4:1-16) Kraisi re nawo segkap, rene habobo tatame rem akekap. (2:19-22) Kraisi re tamekap, rene habobo tatame rem reri takap. (5:22-32) Rem reri kulke tetane. Jisas Kraisi eterke God re tatame remne pap kenakem meten kwobo labo, re remne heyarwai lakerebo. Pol re etop basrasem.

Krais eterke God re nemne tatame ager nenem.

(Sapta 1–3)

¹ An Pol. God re wemke, an Krais Jisas reri werasen yi tame tetane. Kem God reri tatame Efesus kwomke tetane, an kemne gwor siglow basrasbo. Kem Krais Jisas rekene tetane tatame, kem rene omuteke habon reri wule heyar sebo.

² Nemri Apiy Godkene Haneyen Jisas Kraiskene, rep kemne pap meten kwobo labet. Rep kemri pap pultebet, kem pap yenbo temente.

Krais eterke God re nemne Hevenri wos yenbo newobo.

³ Nem God rene wese abo. Re neremri Haneyen Jisas Krais eterri God, re eterri Ha mere. Krais eterke re nemne heyarwai nenbo. Eterke re nemne aboyei Hevenri wos yenbo newobo.

⁴ God re nowsel be nenmenem, re nemne kiyi kenen Krais eterkene tete wem. Opkap nem eterri tatame yenbowai tete. Re nemri wule yaper be wuri late.

⁵ Kiyisape God re nemne pap meten Jisas Krais eterke nem reri yen tete wem. Re eterri wuribaike metekwasen etop nente habom.

⁶ God re nemne pap hadebaswai meten kwobo labem, eterri meseke mogulri Yen eterke re nemne heyarwai nenem. Eker nem God rene pir bukure wete.

⁷ Krais re nemri wule yaperke sam. Reri nepke re God rene kwar pem. Op tem, God re nemri wule yaper poten septim. God reri pap meten kwobo labo wule re sikabe tamewai.

⁸ Re nemne pap bukrewai metbo. Re nemne purere yenbokene wuribai yenbokene kirkir newobo.

⁹ Kiyi God re reri wurbaike habomkap, re Kraisi eterke yaku nente wem, tatame rem be metmenem. Et me berasmenem. Gwopte re reri habomkap nemne heyar peteram.

¹⁰ Reri nente wem wos er gwopkap. Eter wete yabelke, Hevenke tetane wos, nowselke tetane wos, Kraisi reri kulke tete. Kraisi re aboyei wos taresi tame tete.

¹¹ Kiyi tem wos, yuri tete wos, God eter habon webokap, er wos rem etop tebo. Kiyisape God reri habon wemkap, re Juda tatame nemne kenem, nem Kraisi eterke God reri tatame tem.

¹² Nem Juda, nem temnas yin Kraisi rene kiyi omuteke habobem. Eker nem God reri kitimenakene reri hadebas wulekene habon rene pir burkre webet.

¹³ Kem Juda bo tatame, kerem mere, kem God Reri Tuma sekene metem. Er Tuma Yenbo kem metem, kem pow tem. Kem Kraisi rene omuteke habom, eker God re nente wemkap, re Reri Wow kemne newom, kem reri tatame tem.

¹⁴ God Reri Wow re neremkene tetane, eker nem sanetene, God re reri tatame remne newote wem wos, nem potte tetane. God re nemne tupam, eker re nemne potte tetane. Nem etop heyar kowtene, opkap nem God reri kitimenakene reri hadebas wulekene habon rene pir bukri webet.

Pol re God rene wemetem, God re Efesusri tatame remne purere newote.

¹⁵ An metem, kem Haneyen Jisas rene omuteke habobo. Kem God reri tatame nugwape remne pap yewobo.

¹⁶ An etop metem, an God rene wese som abo. An kemne habon God rekene op namrebo.

¹⁷ Nemri Haneyen Jisas Kraisi eterri God, re Apiy hadebaswai. An rene wemetbo, reri Wow re kemne wuribai purere yenbo newote, opak kem God reri tetanekap, kem sanete.

¹⁸ An wemetbo, re kemri wuribai lisokote. Op nente, re kemne peterabo wos kem heyar late. Re kemne wepoten heyar nente wemkap, re reri tatame remne yenbo wos newote wemkap, kem kirkir heyar sanen kowte.

¹⁹ Kem God reri kitimena bukri heyar kirkir sanete. Re reri kitimena bukri rene omuteke habobo tatame nemne kwobo ek labo. Er kitimena bukri re yaku sikabewai kiyi op nenem.

²⁰ Re Kraisi rene wow sene newon rene Hevenke nenewun reri let mame yokwok siruwem.

²¹ Kraisi re etek sitene, re aboyei nelri keryen yen, saberawiy tetane tame, kitimenakene tame, taresi tame remne towsikwuntene. Re etemri Keryen Yen bukrewai. Gwopte re etop tetane, yuri mere, re etopwou temente tetane.

²² God re aboyei nugwape wos Kraisi reri tewo kulke piti wurem. Re Jisas rene lebam, re aboyei woskene rene habobo tatamekene etemri Tare Tame tem.

²³ Jisas rene habobo tatame rem Kraisi eterri wesom. Rem eterke tetane. Rem eterkap tete. Kraisi eter re God eterkap tetane. Re aboyei woskene tatamekene remne gurerekeiptene.

2

God re wem, sam tatame rem Krai eterkene sene pow tem.

¹ Kiyi kem mangure ten agerbo agerbo wule yaper nenbem, kem sa tatamekap temenem.

² Op temenem, kem nowselri wule yaper sehem. Kem nelke tetane omugambo etemri keryen yen, Satan, reri tuma kem etop metbem. God Reri Tuma nasweibo tatame rem reri kulke tetane.

³ Kiyi nem aboyei, nem etopkap temenem. Nem nemri wuribai yaper etopwou nenbem. Nem kworer wesomri wuribai purerewou habon nenbem. Etop nenbo tatame God re remne pap yoken sein nente tetane, re nemne etop kirkir nente tetane.

⁴⁻⁵ Tuma sekene. Nem wule yaper nenbem, nem sa tamekap temenem. Op temenem, God re pap bukri metbo Tame, re nemne pap nugwape meten re nemne pap yewom. Krai eterke, re nemne heyaren nem pow tem. Ekeya. God re kemne pap meten kwobo lam, eker re kemne potem.

⁶ Nem Krai Jisas eterkene tetane. Opkap, God re Krai rene wen tetem, re nemne kirkir newayen tetem. Nem eterkene Hevenke kirkir panen sibo.

⁷ Krai eterke God re nemne pap bukri yewobo. Opkap re reri pap bukri meten kwobo labo wulek, yuri tete tatame remne kebese som peterabet.

⁸ Kem Krai rene omuteke habobem, God re kemne pap meten kwobo lan kemne potem, eker kem pow tem. Et kerem nenem wos bo. Yehow.

God re kemne bupo me pap meten potem, kem pow tem.

⁹ Kem yaku wuri be nenen kem pow tem. Op tem, tatame rem mapurke kworer sig bukure wete.

¹⁰ God re nemne tatame ager nenem. Opkap nem Krai Jisas eterkene tetane, nem wule yenbo nenbo. God re kiyi wem, nem etopkap wule yenbo nenbet.

Krais eterke Juda tamekene Juda bo tamekene rem tame beig wuriwou tem.

¹¹ Kem mettene, Juda tame rem mare tumas kutebo wule sebo. Kem Juda bo tame, kem etop be nenbo. Juda tame rem kemne mare tumas be kutebo tame webu. Mare Tums kutebo wule et tame letke nenbo wos. Etop tetane, kem op heyar habo. Kiyi kem agerbo tame beig temenem.

¹² Kiyi kem Krai eterkene genek temenem. Kem yatamekap temenem. Kem Juda etemri tame beig wuri be temenem. God re Juda etemkene teiktem tumakene remne heyar nente wem tumakene kem be metmenem. Kem nowselke temenem, kem bupo me temenem. Kem yuri yenbo temente wule be habon be kowbem. Kem God rene be sanemenem.

¹³ Kiyi kem God rene genewaiké temenem. Gwopte bo. Krai re sam, reri nepke kem rene meknik yan tem. Opkap, kem God renekene meknik kirkir tetane.

¹⁴ Juda tatame, Juda bo tatame rem peiktame temenem. Pak nenem pisi etemri borborke temenem, rem kena kena temenem. Krai re remne kwobo lan san reri wesomke re er pisi ab beram. Krai eter, re Juda tatamekene Juda bo

tatamekene nemne wuriwouke wurem, nem pap kwuye metho. Nem tame beig wuriwouke tem.

¹⁵ Re Juda etemri hekna habona wulekene Moses Reri Wulekene aboyei sewayan teitkwunem. Etop nenem, re Juda bo etemri tame beigkene Juda etemri tame beigkene remne poten rem eterkene tetane. Eterkene tetane, rem tame beig ager wuriwou tem. Otkap nem etemkene wuribai wuriwouke tem.

¹⁶ Re kwuren peikkeremenem mek sam, re remri wule yaperkene eikene poten septim, sene be tem. Re er kwuren peikkeremenem mek samke, re tame beig pes remne wuriwouke wuren rem wesom wuriketwou tem. Otkap, rem God rekene meknik yan tem.

¹⁷ Krai re yan ei kelmenabo Tuma Yenbo wesowbem. God rene kaike temenem Juda bo tatamekene God rene meknik temenem Juda tatamekene remne re er tuma wesowbem.

¹⁸ Krai eterke nem Juda tatamekene kem Juda bo tatamekene nem God Reri Wow potem, nem God rekene meknik tetane.

Nem Jisas rene omuteke habobo tatame, nemri wesom et God Eterri Kwobor:

¹⁹ Sene kem Juda bo tatame, kem yatamekap bo. Kem God reri tame beig tem. Keremkene agerbo tatamekene kem God reri tatame tem.

²⁰ God re Kwobor nenbo. Jisas reri werasen yi tamekene kiyi temenem tuma wesowbem tamekene rem lobo segkap. Jisas Krai re nawo seg.

²¹ Re er ake heyar keikeretene. Eterke, er ake re bukri ten Keryen Yen God eterri Kwobor tebo.

²² Kerem mere, kem Kraiss eterkene tetane. God re kemne, agerbo Jisas rene habobo tatame remne poten wuriwouke wurbo, kem eterri Kwobor tebo. God eter, Reri Wowkene rep er Kwoborke tetane.

3

Pol re Juda bo tatame remne God Reri Tuma wesowen sewurbem.

¹ Kem Juda bo tatame, kem God reri tame beigke tem, eker, aren Pol, an ake yaperke tetane. An Kraiss Jisas reri yaku nenbemke, rem anne ake yaperke raspite wurem. Er kwobo an God rekene namrebo.

² God eterri pap meten kwobo labo wulek re anne gwor yaku newom, eker re kemne heyar nenbo. An habobo, kem aboyei etop mettene.

³ God re be wos nenem tuma et kiyi me berasmenem, re anne peteram. Er tuma kera an kemne basrasem.

⁴ Kem er tuma late, kem op sanete. Kraiss reri yaku berasmenem tuma, Pol re heyar mettene.

⁵ Er berasmenem tuma, God re kiyi temenem tatame remne be wesowem. Gwopte God Reri Wow re er tuma Jisas reri werasen yi tamekene reri berastene tuma wesow tamekene remne wesowem. Rem tame yenbowai.

⁶ Er kiyi berasmenem tuma re gwopkap. Juda bo tatame rem Jisas reri Tuma Yenbo omuteke mette, rem Juda tatame etemkene rem God reri tame beig tete. Rem Juda tatamekene wesom wuriwouke ten rem God reri wem wos Jisas Kraiss eterke kirkir potte tetane.

⁷ God re anne pap meten re reri kitimena anne newon an Tuma Yenbo wesowbo yaku nen tame tem.

⁸ An habobo, an tame yenbo bo. God reri tatame nugwape rem anne teitkwuntene. Sene God re anne kwobo lan Krai reri Tuma Yenbo wesowte lebam. Re anne Juda bo tatame remne wesowte yaku werasem. Er Tuma Yenbo re Krai eterri yenbo wos wesowbo. Er yenbo wos rem nugwapewai. Nem kebese be karte, nem kebese be seite.

⁹ Aboyei Wos Nenem God, re reri yuri nente habobokap berasem. Nabe nugwape nugwape re reri berasmenem tuma tame wuri be wem. Gwopte re anne werasem, er kiyi berasmenem tuma tobo an tatame remne heyar weiwobo.

¹⁰ Otkap, gwotepte Hevenke tetane lakere tamekene God reri kwomri taresi tamekene rem labo, God re Jisas rene omuteke habobo tatame remne potbo. Rem etop labo, rem God eterri metkereke purere yenbo heyar sanebo.

¹¹ God re kiyi nente habomkap, er wos re Krai Jisas, neremri Haneyen, eterke nenem.

¹² Nem Krai rene omuteke habobo, nem rekene tetane. Otkap nem be akte, nem God rene meknik kebese yibo. Re nemri tuma mette, nem etop sanetene.

¹³ An kemne webo. An kemne kwobo lan rem anne ake yaperke raspite wurem, kem pap yaper kap tete. Kem op habote. Krai re sig bukure som potbo, eker kem metekwaste.

Pol re God rene op wemetem. Efesus tatame rem God rene murese habobet.

14 Apiy God reri nenbopak an etop habobo, an rene gulke pan lom yokwobo.

15 Re aboyei Hevenke tetane tame beig, nowselke tetane tame beig etemri Apiy. Rem etemri sig sekene eterke potbo.

16 Reri wule hadebaswai tetane. Eker an gulke pan rene op wemetbo. Apiy God re reri Wowke re kemne kitimena bukri newobet, kem wuribai heyar temente, reri wule heyar sebet.

17 An rene wemetbo, kem Kraisi rene omuteke habobo, re keremri wuribaike temente. Sel re me nin rene keikeren me re kitimenakene tetetenekap, kem pap yewobo wule heyar keikeren sebet.

18-19 Opkap kerem, God reri nugwape tatame mere, kem kitimenakene purere poten kem Kraisi reri pap yewobo wule heyar sanete. Reri pap yewobo wule et burkrewai, et laguwai, et ikyawai, et kik tetane. Ekeya. Kraisi re tatame remne pap yewobopak nemri wuribai teitkwuntene. Reri pap yewobo wule kem sanete. Opkap God re tetanekap kem kirkir poten wuribai pilaute.

20 God reri kitimena neremkene ten yaku nenbo. Nem rene wemetbokap, nem potte habobopak, re nemne etop kebese nenen nugwape nugwapa som nenbo.

21 God eterri tatamekene Kraisi Jisas eterkene rem God rene hadebas tuma webet. Rem rene hadebas tuma somsom webet. Et sekenewai.

**Nem Kraisi eterri wesom, eker
nem God reri wule heyar nenbet.**

(Sapta 4–6)

4

Nem Kraiss rene omuteke habobo tatame, nem Kraiss reri wesom.

¹ An Haneyen reri yaku nenbem, eker an ake yaperke tetane. Opkap an kemne eker omuteke op webo. God re kemne wepotem yabel, re kemne wule yenbowai nente wemkap, kem etopkapwou som nenbet.

² Kem gwop som nenbet. Kem kworer teitkwunen agerbo tatame remne tuma elen me namren wule yenbowou nente. Kem remne pap yok tuma sein kap wete. Kem remne gwule kap tete. Opkap kem pap yewobo wule remne peterate.

³ God Reri Wow re wuribai wuriwou wule tatame remne newobo. Kem er wule heyar sete. Kem awosein awosein pap yenbo tete, opkap kem wuribai wuriwou sete.

⁴ Nem Jisas rene habobo tatame, nem wesom wuriketwou tetane. Nem Wow wuriketwou tetane. Et God Reri Wow. God re nemne wepotem, eker re nemne yuri yenbo nentekap, nem heyar kowmente.

⁵ Haneyen wuriwou tetane. God rene omuteke habobo wule wuriwou tetane. Okke tirmunbo wule wuriwou tetane.

⁶ God wuriwou tetane. Re aboyei tatame etemri Ha. Re Keryen Yen bukrewai. Aboyei wos reri kulke tetane. Re eterri yaku remkene wulare wulare nenbo. Re aboyei woske tetane.

⁷ Kraiss re wemkap, re nemne wulare wulare kitimena kena kena newom.

⁸ God Reri Tuma op webo.
Re ikyawai yawumke,
re reri keikerem tatame

nugwape remne panen
yawum. Re tatame remne
nkitimena kena kena newom.

(Buk Song 68:18)

⁹ Re yawum, er tuma tobo gwor. Kiyi Kraisi re sel kik warem, sene re wayen yawum.

¹⁰ Kiyi warem Tame, sene re yawum. Re Hevenke yawum, ikyawai som yawum. Otkap re aboyei emik tetane.

¹¹ Eter re tatame remne kitimena newom. Rane re remne werasen yi tame yaku nente kitimena newom. Rane re remne God Reri Berastene Tuma wesowte kitimena newom. Rane re remne kwomke kwomke sewuren Jisas reri Tuma Yenbo wesowte kitimena newom. Rane re remne God Reri Tuma peikte kitimena newom. Rane re remne God reri purere peikte kitimena newom.

¹² Kraisi re wem tatame aboyei, rem etemri yaku yin nenbo. Otkap, Jisas rene habobo tatame nugwape rem sespe ten Haneyen reri yaku rem kebese kirkir nenbo.

¹³ Nem etop nenen yite, nem aboyei, nem God reri wulewou omuteke habon wuribai wuriwou tete. Nem God Reri Yen rene heyar sanete, eker nem sespe tete. Kraisi re yenbosubuwai, nem eterkap tete.

¹⁴ Nem eisow yenkap be tete. Eisow yen rem polikene ok burowkene yan pere tenbula tanbulabokap. Rem tame yaper remri yikoko tuma omuteke metbo. Rem wuribai purere yaperkene tame remne semowbo. Otkap, rem wule yaper nenbo.

¹⁵ Nem etop be nente. Nem agerbo tatame remne pap yewon tuma sekene webet. Otkap, nem sespe

ten nem neremri tare si tame Kraiss, eterkap tete.
¹⁶ Nem eterri kulke tetane, nem eterri wesomri let tewokap. Wesom rem wuriwouke natirtenekap, nem eterkene bogtene. Nem awosein awosein pap yewon nemri wulare wulare yaku nenbo, opak Kraiss eterri wesom re muyen kitimenakene tebo.

Jisas rene habobo tatame rem wule ager setene.

¹⁷ An Haneyen reri sigke kemne ei me pebo. God rene be habobo tatame etemri nenbokap kem sene mane nente. Remri wuribai et yaperwai.

¹⁸ Remri wuribai kerneir kitkapke tetane. Rem wor tebo, rem mangure tebo. Rem God reri tame beig be tetane.

¹⁹ Rem yaper was nenbo, rem sebera be yabo. Rem yikokobo wule nenbo. Rem metkereke sebera yabo was pap teten nenen yin kworer be sewaibo.

²⁰⁻²¹ Kraiss reri yaku nen tame rem kemne etopak wule yaper be peikem. Rem Kraiss eteri wule peikbem. An habobo, kem Kraiss rene metem. Kem reri anepoi tatame tem, rem kemne reri wule sekene peikbem.

²² Kiyi kem wuribai yaper nenbem. Kemri wuribai yaper re pap teten yaper was kem etop nenbem. Er wuribai yaperke kem yaper tebo. Opkap, kem kemri kiyiri wuribai yaper me septete.

²³ Kem papkene wuribaikene agerwai poten tete.

²⁴ Kem tatame ager te. God re ager nenem tatame, rem God eterkap tebo. Rem wule yenbowai sekene nenbo.

²⁵ Kem tuma mane yikokote. Nem Jisas rene habobo tatame, nem wulare wulare nem Kraisi eterri wesom tep tetane. Opkap, kem aboyei, kem tuma sekenewou gesmase remne webet.

²⁶ Kem pap yokte, kem yaper wos kap nente. Kem pap yoken temente, yabel ek warte, et yaper.

²⁷ Kem Satan rene eru kap tagwote.

²⁸ Wos bisi abo tatame rem bisi sene mane ate. Rem yaku yenbo muresi nenen etemri kel sekene potte. Op nente, rem woskene bo tatame remne kwobo lan wos kebese newote.

²⁹ Kem tuma yaper kap wete. Kem tuma yenbowou webet. Kem tatame remne kwobo late habon etop webet. Kem etopkap webet, kem remne yenbo nenbet.

³⁰ Kem wule yaper nente, God Reri Yenbowai Wow re pap yaper tete. Kem rene etopkap kap nente. Nowu re ayer reri nowu rene newobokap, God re Reri Wow kemne newom. Opkap, kem sanetene, kem God eterri tatame. Kem sanetene, yuri tete Yabel, God re kemne potte, kem yenbowai tete.

³¹ Kem agerbo tatame remne wuribai yaper kap tete. Kem remne gwule kap tete. Kem remne pap kap yokte. Kem remne tuma kwobke kap wete. Kem remne tame kap kwuyete. Opkap tuma yaper kem sene mane wete.

³² Kem keremwou keremwou pap meten heyar nente. Kraisi eterke God re kemri nenbem yaper wos poten septim, re kemne tuma be nenem. Opkap, kem keremwou keremwou etop nenbet.

Haneyen re tuwkap keretene, nem etek sewurbet.

¹ Kem God eterri meseke mogulri yen, eker eter tetanekap, kem etop tebet.

² Kem pap yewobo wule heyar sebet. Krais re nemne pap yewobo wule peteram. Re nemne pap yewon nemri kwobok sam, re God rene kwar pem. God re reri wule lam, re er bos yenbo meten metekwasem.

³ Kem God reri tatame, opkap kem sebera yabo wule, yaper nenbo wule, keremwou potbo wulekene mane nente. Opkap yaper wos kem wuri kap namrete.

⁴ Tuma yaper, yogu townebo tuma, sou barou webo tuma, kem kap wete. Kem gwop nente. Kem God rene wese abet.

⁵ Kem heyar mette. Muye bisi mare bisi yibo tatame, sebera ya wos nenbo tatame, etemwou potbo tatamekene rem Kraiskene Godkene repri panen si kwom be yite tetane. Metye. Etemwou potbo tatame rem sukwiye wurabo tatamekap. Etem mere rem repri kwom be yite tetane.

⁶ Tuma bop webo tatame rem kemne kap yikokote. Remri tuma kem omuteke kap mette. An kemne webo. Etop nenbo tatamekene God reri tuma be metbo tatamekene etemne God re pap yokte tetane.

⁷ Opkap tatame remkene kem kap gerate.

⁸ Kiyi kem kerneirke temenem. Sene kem Haneyen eterri yabel geiri tatame tem. Wuribai yenbo ten yabel geike tetane tatame etem nenbopak, kem etopkapwou nenbet.

⁹ Yabel geike tetane tatame rem metkereke wule yenbokene wule sekenekene nenbo.

¹⁰ Kem yaku nenen kem Haneyen eter metekwasbo wuleri purere potte.

¹¹ Kerneir kitke tetane tatame remri nenbo was bop kem meknik kap tete. Kem remri nenbo wule yaper kwom geike raste.

¹² Remri berasen nenbo wule yaper et sebera yabo was. Nem etop mapurke namrete.

¹³ Aboyei was kwom geike tete, be was yenbo be was yaper nem kebese lan sanete.

¹⁴ Be was kwom geike tete, er was re yabel geike kirkir tete. Opkap, nem op webo.

Tuknatene tame, ne opu wayen si.

Ne selek wayen site.

Krais re nene wuribai yenbo newote, ne yabel geike tete.

¹⁵ Op tetane, kerem nenbopak kem heyar habon la. Wor tetane tatame etem nenbopak, kem etop mane nente. Purere tetane tatame etem nenbopak, kem etop nenbet.

¹⁶ Gwopte yabel et yabel yaper. Opkap kem God re kemne peterabopak etop nenbet.

¹⁷ Kem wuribai yaper kap tete. Haneyen reri wuribai kem wemetbet.

¹⁸ Kem ok yaper kap an sisipete. Op nenbo tatame rem yaper tebo. Kem God Reri Wow eterri kulke wuren som temente.

¹⁹ Kem Jisas rene habobo tatame remkene namrete, kem Devit eter basrasem sekworu tumake namrete. God rene lom yokwobo sekwokene God Reri Wow kemne newobo sekwokene kem God

rene habon sekwo lomte. Kemri wurbaike kem er sekwo kirkir lomte.

²⁰ Be wos be wos keremne tete, kem Apiy God rene wese abet. Nemri Haneyen Jisas Kraiss reri sigke kem God rene kwokwos kwokwos wese abet.

Pol re nar panetene tatame remne weiwebo tuma.

²¹ Kem Kraiss reri kulke tetane, opak kem God reri tatame etemri webo tuma awosein awosein mette.

²² Kem tame yim ta, kem Haneyen reri kulke tetanekap, kem keremri tame remri kulke temente.

²³ Kraiss re reri tatame etemri Temnas Yi Tame. Rem eteri wesom, re remne potem. Etopkap, tame rem remri ta etemri temnas yi tame.

²⁴ Kraiss reri tatame rem reri kulke tetanekap, kem ta, kem kemri tame etemri kulke temente.

²⁵ Kem ta panetene tame. Kem keremri ta remne pap yewon metekwasbet. Kraiss re reri tatame remne pap yewon remne kwobo lan samkap, kem kemri ta remne pap etopkap yewobet.

²⁶ Kraiss re reri tatame remne okkene wiyruwem. Sene re wemke, rem tatame yenbo tem. Opack rem God eterri tatame tem.

²⁷ Kraiss re remne potte, re remne monukap late selbo. Re remri wuribai yenbowai late. Re remne wule yaperkene sebera ya woskene be wuri late. Re remne etopkap potte.

²⁸ Kem tame, kem kworer wesom pap yewobokap, kem kemri ta remne opak pap

yewobet. Tame re reri ta tene pap yewobo, re reri wesom kworer kirkir pap yewobo.

²⁹ Yike tame re reri wesom re kworer yaper be nenbo. Yehow. Re reri wesom awos newon an heyar lakerebo. Krai re rene habobo tatame nemne etopkap lakerebo.

³⁰ Nem Krai reri wesom tep.

³¹ God Reri Siglowri Tuma op webo.

Opkap, tame re nawoha
mesegenen ta panebo, rep
wesom wuriwou tebo.

(Stat 2:24)

³² Gwor berasmenem tuma tobo, et kik tetane. Aren, an habobo, er tuma tobo et Kraiskene eterri tatamekene etemne webo tuma.

³³ Gwor tuma et keremne kirkir webo. Kem wulare wulare tame, kem keremri kworer pap yewobokap, kem keremri ta remne etopkap pap yewobet. Kem ta, kem kemri tame remri kulke ten remne wule yenbo nenbet.

6

Pol re yenkene nawohakene etemne weiwebo tuma.

¹ Kem yen, kem kemri nawoha rem kemne webo tuma, kem heyar meten nenbet. Kem etop nente, et wule yenbo.

² God re Moses rene newom Wule wuriwou re kemne yenbo wos kirkir nente wem. God Reri Tuma op webo.

Kem keremri nawoha remri
tuma heyar meten nenbet.

Reri teiktem tuma gwor.

³ Etop nenbet, kem yenbo temente, kem nabe nugwape gwor nowselke temente.

⁴ Kem nawoha, kem kemri yen remne yaper kap nenen rem kemne pap kap yokte. Yehow. Kem remne heyar nenen Haneyen reri wulekene tumakene remne heyar peiken peterabet.

Yaku nenbo tatamekene yaku lakerebo tamekene remne Pol re tuma weiwem.

⁵ Kem yaku bop nenbo tatame, kem keremri yaku lakerebo tame remri kulke tete. Kem remne aken polpolen remri tuma heyar meten nenbet. Kem wuribai wuriwou ten yaku yenbo nenbet. Kem Kraiss reri yaku heyar nenbokap, kem kemri yaku lakerebo tame etemri tuma kirkir etop meten heyar nenbet.

⁶ Kem sig yenbo potte, kemri yaku lakerebo tame remne kap yikokon remri bitmiwouke yaku yenbo ek nente. Yehow. Kem op habote. Kem Kraiss reri yaku bop nenbo tatame tetane. Opack, God eter webokap, kem wuribai yenbo ten yaku etop nenbet.

⁷ Kem metekwasen yaku nenbet. Kem tameri yakuwou be nenbo. Yehow. Kem Haneyen reri yaku kirkir nenbo.

⁸ Nem habote. Yaku bop nenbo tatamekene kel yaku nenbo tatamekene rem yaku yenbo nente, Haneyen re remne tokwo yenbo wulare wulare sein newote tetane.

⁹ Kem yaku lakerebo tame, kem keremri yaku nen tatame remne wule yenbo kirkir nenbet. Kem remne akbo tuma kap wete. Kem metene, Haneyen Jisas re Hevenke tetane, re keremri Haneyen. Re kemri yaku nen tatame etemri

Haneyen mere. Wule wuriketwou re aboyei tatame remne nenbo. Re etem nenbo wos se pen remne etopkap sein nenbo.

Jisas rene habobo tatame rem ei nai tamekap.

¹⁰ Tuma tep tetane. Haneyen reri kitimena et bukrewai. Kem eterke kiytene, kem reri kitimena potte, kemri kitimena bukri ek tete.

¹¹ God re kemne newobo ei nai wos kem pot. Opkap, kem muresen teten Satan re kemne yikokobo wule re seilaweite.

¹² Heyar habo. Nem more tatame etemkene be naibo. Yehow. Kitimenakene omugambokene etemri taresi tamekene nelri kerneirke tetane kitimenakene tame yaper, nem remkene naibo.

¹³ Gwopte kem God reri ei nai wos opu poten se. Opkap, yabel yaper wuri tete, er peiktame rem yan keremkene naite, kem kebese nayen yin legete, kem kitimenakene som mol pan tetete tetane.

¹⁴ Kem gwopkap ei sin kowte. Ei nai tame rem somokep sibokap, kem wule sekene poten site. Ei nai tame rem tame oub pakap wesom subrasbokap, kem yenbo nenbo wule poten etopkap nente.

¹⁵ Ei nai tame rem tewo bus wun sewurbokap, kem pap yenbo tebo Tuma Yenbo poten wesowen sewurte.

¹⁶ Ei nai tame rem wol sebokap, kwokwos kwokwos kem God rene omuteke habobo wule som sebet. Opkap, tame yaper, Satan, re kerkene amrek kemne kilen pete, er amre rem wolke pen yeren kerkene amre re sate.

¹⁷ Ei nai tame rem tare bus tarek gumbokap, God re kemne potbo wule kem sebet. God Reri

Wow re kemne newobo pi, kem kirkir poten sebet. Gwor pi et God Reri Tuma.

¹⁸ Kem etop nenbo, kem God rekene tuma kirkir namrebet. Be wos be wos tete, kem God Reri Wow eterke God rekene tuma namrebet. Aboyei metkereke tuma kem rekene omuteke namren re kemne kwobo late. Kem heyar lakeren God rekene narembo wule kap mesegente. Kwokwos kwokwos kem aboyei Jisas rene habobo tatame remne habon God rekene namrebet.

¹⁹ Arenne mere, kem anne habon God rene op wemetbet. Re anne newon tuma, an mol pan teten remne wesowte. An berastene Tuma Yenbo remne heyar wesowbet. Kem rene etop wemetbet.

²⁰ God re anne werasen an Krai reri tuma wesowen yaku nenbem, eker an ake yaperke tetane. Kem God rene wemette, an reri tuma kebese mol pan teten wesowbet.

Polre God rene wemetem, re remne yenbo nente.

²¹ Aren tetanekap, aren nenbokap, Tikikus re kemne heyar wesowte. Re neremri mase yenbo. Re Haneyen reri yaku omuteke nenbo tame.

²² An rene werasen re kemne lasyate. Opkap, nem tetanekap, kem mette. Pap kitimena newobo tuma re kemne kirkir wesowte.

²³ Apiy Godkene Haneyen Jisas Kraiskene rep keremkene aboyei gesmasekene kemne etop newote. Rep kemne pap yenbo tebo wule, pap yewobo wule, omuteke habobo wulekene newote.

²⁴ Neremri Haneyen Jisas Krai rene pap som yewobo tatame remne God re pap meten kwobo labet.

God Reri Teiktem Tuma Ager
The New Testament in the Yamano Dialect of the
Yessan-Mayo Language of Papua New Guinea
Nupela Testamen long tokples Yssan-Mayo Yamano
long Niugini

copyright © 1980, 2004 Lutheran Bible Translators

Language: Yessan-Mayo (Yamano) (Yessan-Mayo)

Dialect: Yamano

Translation by: Lutheran Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 18 Apr 2025 from source files dated 31 Aug 2023

61a6ffd9-3aa5-58b7-982d-b5ada9490557